

3. Anera Kestendžić, članica iz reda stručnih radnika zaposlenih u Ustanovi.

II

Ovo Rješenje stupa na snagu narednog dana od dana donošenja i objavit će se u "Službenim novinama Kantona Sarajevo".

Broj 02-04-15045-14.2/20
05. juna 2020. godine
Sarajevo

Premijer
Mario Nenadić, s. r.

Ministarstvo za boračka pitanja Kantona Sarajevo

Na osnovu člana 68. stav 3. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05) i člana 64b. Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", br. 45/12 - Prečišćeni tekst, 26/14, 46/17, 18/19 i 20/20), ministar za boračka pitanja Kantona Sarajevo donosi

INSTRUKCIJU O DOPUNAMA INSTRUKCIJE O NAČINU IZVRŠENJA UPRAVNIH I STRUČNIH POSLOVA U POSTUPKU ODLUČIVANJA O PRAVU NA NOVČANU EGZISTENCIJALNU NAKNADU DEMOBILIZIRANIH BRANILACA

Član 1.

U Instrukciji o načinu izvršenja upravnih i stručnih poslova u postupku odlučivanja o pravu na novčanu egzistencijalnu naknadu demobiliziranih branilaca ("Službene novine Kantona Sarajevo", broj 21/20) (u daljnjem tekstu: Instrukcija) u članu 2. iza stava 1. dodaje se novi stav 2. koji glasi:

"Povratnici u Republiku Srpsku mogu ostvariti pravo na novčanu egzistencijalnu naknadu pod uvjetom da su imali boravak na području Kantona Sarajevo prije povratka u prijeratno mjesto prebivališta uz ispunjavanje uvjeta propisanih članom 64a. Zakona, a zahtjev za ostvarivanje prava podnosi se općinskoj službi za boračko-invalidsku zaštitu u kojoj su imali prijavljen boravak. Nakon navršavanja 57 godina života korisnik može eventualno ostvariti pravo na novčanu egzistencijalnu naknadu u skladu sa članom 23. stav 2. Zakona o pravima demobiliziranih branilaca i članova njihovih porodica ("Službene novine Federacije BiH", broj 54/19)."

Dosadašnji stavovi 2., 3., 4. i 5. postaju stavovi 3., 4., 5. i 6.

Član 2.

U članu 3. iza stava 3. dodaje se novi stav 4. koji glasi:

"U smislu uvjeta iz člana 64a. Zakona, da podnosilac zahtjeva ostvaruje mjesečne prihode u iznosu manjem od 50% minimalne penzije isplaćene u Federaciji Bosne i Hercegovine za mjesec decembar 2018. godine, odnosno da ukupan iznos prihoda ne prelazi iznos od 174,03 KM mjesečno, mjesečna novčana primanja djece ratnih vojnih invalida sa utvrđenim invaliditetom od 20 do 80% - dječiji dodatak, neće se uračunavati u mjesečna primanja podnosioca zahtjeva.

Član 3.

U članu 4. iza stava 1. dodaje se novi stav 2. koji glasi:

"Podnosilac zahtjeva je dužan osigurati da dostavljeni žiro račun bude aktivan, te će sam snositi posljedice neaktivnosti računa (npr. povrat uplate, odnosno nemogućnost blagovremene uplate i slično)."

Dosadašnji stavovi 2. i 3. postaju stavovi 3. i 4.

Član 4.

U članu 5. iza stava 5. dodaje se novi stav 6. koji glasi:

"Ministarstvo će pismenim aktom obavijestiti nadležnu službu za boračko-invalidsku zaštitu da je u postupku nadzora data saglasnost na prvostepeno rješenje."

Član 5.

U članu 9. iza stava 3. dodaje se novi stav 4. koji glasi:

"Novčana egzistencijalna naknada ne može biti osnov za kreditno zaduženje korisnika u smislu da se na istu općinskoj službi za boračko-invalidsku zaštitu, odnosno Ministarstvu uspostavi administrativna zabrana i vrši plaćanje obustave, ali može eventualno biti predmet prinudne sudske naplate i sudske izvršenja, a sve za vrijeme dok korisnik ostvaruje novčanu egzistencijalnu naknadu."

Član 6.

Ova Instrukcija stupa na snagu danom donošenja, a objavit će se u "Službenim novinama Kantona Sarajevo".

Broj 06-02-14991-4/20
11. juna 2020. godine
Sarajevo

Ministar
Hajrudin Grabovica, s. r.

Ministarstvo komunalne privrede i infrastrukture Kantona Sarajevo

Na osnovu člana 66. stav 2. Zakona o organizaciji organa uprave u FBiH ("Službene novine Kantona Sarajevo", broj 35/05), člana 4., stav 15. i 20. Zakona o komunalnim djelatnostima ("Službene novine Kantona Sarajevo", broj 14/16; 43/16; 10/17 i 19/17) i odredaba Uredbe o održavanju javne rasvjete ("Službene novine Kantona Sarajevo", broj 22/16), Ministrica komunalne privrede i infrastrukture donosi

PRAVILNIK O TEHNIČKIM USLOVIMA SISTEMA JAVNE RASVJETE KANTONA SARAJEVO POGLAVLJE I. OSNOVNE ODREDBE

Član 1.

(Predmet Pravilnika)

Pravilnikom o tehničkim uslovima sistema javne rasvjete Kantona Sarajevo (u daljem tekstu: Pravilnik) propisuju se propisi i tehnički normativi koji se moraju poštivati prilikom primjene ovog Pravilnika.

Član 2.

(Oblast primjene Pravilnika)

- (1) Ovim Pravilnikom se definiraju tehnički uslovi sistema javne rasvjete Kantona Sarajevo u sljedećim slučajevima:
- tehnički uslovi kod izgradnje, rekonstrukcije i/ili nadogradnje javne rasvjete,
 - tehnički uslovi kod postavljanja akcentne rasvjete - iluminacija,
 - tehnički uslovi za postavljanje dekorativne rasvjete,
 - tehnički uslovi za postavljanje zastava,
 - tehnički uslovi za postavljanje reklamnih panoa,
 - tehnički uslovi za postavljanje turističkih i drugih putokaza,
 - tehnički uslovi za postavljanje radara i nadzornih kamera na stubove javne rasvjete,
 - tehnički uslovi kod postavljanja instalacija kablovskih operatera,
 - tehnički uslovi za održavanje sistema javne rasvjete,
 - tehnički uslovi za izmještanje elemenata sistema javne rasvjete,
 - tehničke karakteristike svjetiljki po tipovima saobraćajnica i javnih površina,
 - opći uslovi za javnu rasvjetu Kantona Sarajevo,